


Charla di Fundacion pro Persona cu Dislexia

ORANJESTAD - Fundacion pro Persona cu Dislexia ta un fundacion cu a keda lanta dia 21 di februari 2013 cu e proposito di yuda combati e problematica di dislexia y discalculia aki na Aruba. Actualmente e Fundacion su directiva ta consisti di: Eveline Arends -presidente; Roraima Arends - secretario; Suzanne Richardson - tesorero y como miembro: Amarilis Velázquez, Sharlyn Farro y Ramon Todd Dandaré.

Segun Articulo 2 di e statutan e obhetivo (of meta) principal di Fundacion pro Persona cu Dislexia ta: Salvaguardia e derechonan di persona cu dislexia (trastorno cu lesamento) y/of discalculia (trastorno cu rekmento) en particular y di persona cu discapacidad en general den comunidad Arubiano y otro caminda, den e sentido mas amplio di e palabra. Tambe salvaguardia tur loke ta relaciona directamente of indirectamente cu un ke otro of cu por ta beneficioso pa logra e obhetivo (meta), den e sentido mas amplio di e palabra. Entre e medianan cu e Fundacion ta uza pa logra e obhetivo (meta) tin:

1. stimula un maneho consecuente respecto enseñansa na persona cu dislexia y/of discalculia y nan tratamento y remediation, y un maneho consecuente pa loke ta e exigencianan cu ta pone



2. haci investigacion tocante e diferente tiponan di dislexia y discalculia cu tin denter di comunidad Arubiano y promove nan tratamento y remediation;
3. desaroya y/of adapta material di siñamento pa mucha cu ta bay scol cu ta sufri di un of otro tipo di dislexia y/of discalculia;
4. organisa actividad pa persona cu dislexia y/of discalculia, pa mayor di mucha cu ta bay scol cu ta sufri di nan, pa esunnan cu ta duna enseñansa (maestro) y pa un publico mas amplio tocante

dislexia y/of discalculia y nan tratamento y remediation;

5. colabora y/of coopera cu instancia, instituto y/of organisacion na Aruba y pafo di Aruba cu ta aspira un obhetivo similar of afín y
6. percura pa saca publicacion tocante topico cu ta relaciona cu dislexia y/of discalculia y nan tratamento y remediation y, pa lo demas, tur loke ta relaciona directamente of indirectamente cu nan y tur otro medio cu por ta beneficioso pa logra e obhetivo (meta) (di e Fundacion), den e sentido mas amplio di e palabra.

E Fundacion a pone como meta su dilanti traha pa tur persona cu (por) tin dislexia y/of discalculia, particularmente traha conhuntamente cu e mayornan cu nan yiu tin problema pa siña (pa via di dislexia y/of discalculia) y yuda tanto e mayornan como otro persona interesa cu mas informacion posibel tocante e dos trastornonan aki. Ta e mayornan ta esunnan cu tin den nan man e futuro di nan yiu(nan). Cu pasenshi y bon guia nan por yuda nan yiu pa ta mas sigur di su mes. Un bon contacto cu scol y siñamento encuanto e parti di enseñansa aki ta yuda nan, como mayor,

contribui na e conocimiento academico di nan yiu(nan). Con mayor, tutor of maestro por sa si nan yiu(nan) y/of alumno(nan) tin dislexia of discalculia? Tin varios cos cu por duna indicacion di e problema aki. Tocante esaki y mas tin e siguiente anochinan di informacion: **Na MFA San Nicolas na Scol Santa Teresita dia 11 di juli 2019, cuminsando anochi 7:00 or. Tur persona interesa ta bonbini, particularmente e mayornan y e maestro-nan!**